

欽定剿平粵匪方略

欽定勦平粵匪方略卷七十七 甲寅年

正月十九日

己未

吳文鎔奏言查臣於黃州勦賊

獲勝後下巴河之賊於新正初五六日分股竄  
至上巴河地方滋擾臣卽派都司周祿等冒雪  
前往行抵上巴河該匪等已聞風遁至隔河之  
竹瓦店地方盤踞我兵卽趕緊覓渡鄉民代覓  
木筏乘夜搭成浮橋次日兵勇齊抵竹瓦店街

口賊匪伏匿不出該都司等進街誘敵軍功張  
開甲甫至街中見有執大黃旗賊目一名奔來  
卽上前撲捕該匪等矛刺張開甲二傷倒地張  
開甲帶傷掙起將執大黃旗賊目砍斃割取首  
級退出街口該匪等大衆出街道來我兵四面  
環攻斃賊一百餘名餘匪向下巴河逃去復徧  
加搜捕已無一賊容再相機進剿奏入報

聞

二十一日

辛酉

琦善奏言正月初九日

臣親督官

兵自三汊河分路進剿瞿騰龍德興阿等由運  
河西岸進攻陳金綬督參將鞠殿華等由運河  
東岸進攻總兵多隆武侍衛穆克登額在後防  
賊抄襲我兵用礮對賊營轟擊賊匪堅拒不出  
旋見賊船百餘隻由鎮江渡江來援當經馬步

隊官兵勦殺斃賊百餘名瓜州出賊千餘經鞠  
殿華等分路迎敵復斃多名初十日翟騰龍等  
仍由西岸前進賊匪槍礮如雨官兵攜帶木板  
搭橋越濠並用火毬火箭向賊營拋放將西岸  
賊營全行焚燬是日陳金綬督兵由東岸進攻  
敗其設伏之兵十一日翟騰龍德興阿帶領馬  
步官兵由西岸過河攻撲賊營奮勇衝殺賊匪

敗潰焚燬賊大船五隻其東岸之賊亦經陳金  
綬擊退十三日臣親赴三汊河督陳金綬瞿騰  
龍德興阿等由運河東西兩岸直撲瓜州陳金  
綬等由東岸行至四里鋪賊匪整隊相待約數  
百人千總滕兆魁開放銅礮轟斃賊匪甚多瞿  
騰龍德興阿由西岸前進督率遊擊馬永泰等  
衝撲賊營誘令出巢該逆果衝出二千餘名我

兵俟其入伏合力衝殺該逆腹背受敵自相踐  
踏弁兵乘勝掩殺計斃七八百名臣仍親督官  
兵上緊攻勦以期早克堅城

同日楊以增奏言查廬州驛路直連徐州計七  
百餘里現在豐北以下黃河斷流若沿岸設防  
非數十萬重兵不敷分布因思黃河以南有淮  
河東西橫亙亦屬天險現在賊踞廬州距淮不

遠臣已咨各路帶兵大員扼守淮南並責成淮  
南北各州縣實力團練以助兵力之不足否則  
賊偏長淮溯流而下徑達洪湖較之由陸路北  
趨徐州其勢更易是洪湖水陸隘口尤關緊要  
上年所派參將蔡天祿等募練水勇二千餘人  
槍礮技藝均屬可觀現已嚴飭防範至福濟赴  
援皖省臣於未奉



諭旨之先卽將山東官兵四百餘名撥歸統帶並撥給  
清河縣練勇三百名隨住攻勦茲又將蔣壩駐  
紮守備張鼎元所帶兵丁籌給口糧飭令馳往  
福濟行營聽候調遣均奏入報

聞

同日青慶奏言臣於初九日晉省卽與撫臣崇  
綸細商現在省城僅有兵勇四千餘名將就分

撥至水陸各要隘直無兵可分查漢口最爲緊  
要現有四川松潘建昌兩鎮統帶官兵已至湖  
北之巴東利川二縣防堵原係四川交界門戶  
但巴東利川非由漢口不能到是防漢陽漢口  
與防巴東利川無異臣已飛咨四川督臣裕瑞  
商派該鎮一員帶兵二千前來漢陽漢口防守  
再同知伍煜駐守漢口寬嚴有法民心愛戴土

匪頗爲斂跡現督臣札調赴營臣與撫臣商酌  
仍將該員暫留漢口以資得力

青慶又奏言查湖北軍情緊要文武各員生手  
居多已革高廉鎮楊昌泗前帶兵到德安時臣

見其人頗謹慎久歷戎行現經督臣叅奏伊自  
知罪戾仍復晝夜幫同守城未敢稍耽安逸臣  
詢以守城之法亦頗熟悉合無仰懇

天恩暫將楊昌泗留在武昌令其帶罪效力出自  
逾格恩施奏入

上命軍機大臣傳諭青麀曰青麀奏抵省日期並派兵  
防守漢陽漢口情形覽奏均悉上年據崇綸奏稱賊  
踞巴河屢勸督臣派兵攻剿決意不從閉城坐守嗣  
據吳文鎔遞陳崇綸與該督齟齬及吳文鎔遵旨帶  
兵出省崇綸又稱俟兵餉充足督臣再行親往吳文

鎔任性偏執勿促卽行朕閱該督撫歷次奏報無非彼此爭辯不能和衷辦事督撫大吏責任封疆若各挾私意必致貽誤地方著青麐將該督撫因何起釁不和緣由秉公密察據實具奏

上諭內閣曰已革高廉鎮總兵楊昌泗著留於湖北帶罪效力楊昌泗本係革職發往軍臺之員如再不知奮勉卽著崇綸等嚴叅從重治罪

同日

上命軍機大臣傳諭僧格林沁勝保德勒克色楞西凌  
阿善祿曰逆匪由獨流靜海竄出占踞東城村一帶  
經該大臣等統帶馬步各隊先後趕到並據奏稱瑞  
麟慶祺培成伊勒東阿達洪阿等均已次第到營德  
勒克色楞此時想亦由固安折回現在大兵雲集逆  
匪竄踞鄉村喘息未定正當趁勢督兵圍剿連日亟

盼捷音乃數日來未據續報兵貴神速似此觀望遷延使逆匪得以從容防備又成負嵎之勢攻剿更難得手僧格林沁追賊至河間尙屬奮勉乃遷延數日未見有何振作朕實不解勝保辦理軍務以來毫無成效若再不奮勉國法豈能倖逃汝二人現在一處斷不准互相推諉致誤全局果能在正月內掃數殲除同受厚恩不獨有益於國亦全朕用人體面汝二

人熟思攻勦之策勿再貽誤著僧格林沁勝保嚴飭各路帶兵大員趕緊進攻將此股逆匪剋日殄除以慰朕念

二十二日

壬戌

僧格林沁勝保奏言東城一帶村

落稠密樹木叢雜逆匪分股竄踞六七村莊雖已分兵扼守竊恐少有疏漏附近糧米卽以資寇且據難民及生擒賊犯供稱該逆不敢遽竄



步步挪移向前侵占村莊乘隙圖竄等語臣等  
出示令西南兩面附近賊巢三十里內村居人  
民將所存糧食草料搬運遠徙庶賊野無所掠  
其勢易潰奏入

上諭曰可見該逆未有久踞之意攻剿更應得手解散  
脅從隨時酌量出示辦理

曾格林沁勝保又奏言臣等逐日親督官兵圍

攻該逆狡猾異常堅匿不出十八日卯刻出隊  
該逆亦出隊排列直至申刻我兵始得抄圍斃  
匪數十名奪獲馬匹槍礮旗幟數十件該逆一  
經受傷仍卽奔回村內堅守礮火猛烈我兵難  
於逼近各營僅有五百斤礮位其力較微擬俟  
大礮運來卽行極力攻勦至逆匪自靜海獨流  
潰圍逃竄經臣僧格林沁督兵追擊斃賊二千

餘名該弁兵等尙屬奮勉可否懇

恩准擇其尤爲出力者酌量保奏出自

聖裁奏入

上諭內閣曰逆匪由獨流靜海竄至束城村一帶經僧  
格林沁帶兵追勦頗有斬獲尙屬奮勉及至逆匪占  
踞村莊仍復遷延數日未見立功勝保自到獨流經  
朕屢次嚴諭務將此股逆匪掃除淨盡乃以圍攻數

月之賊又任乘閒逃竄致滋蔓延均屬罪無可逭朕  
屢次寬宥不加嚴誅正冀其奮勉圖功稍贖前愆本  
日據奏勦賊各情雖經疊有斬擒總未能痛加剋洗  
現在德勒克色楞瑞麟慶祺培成伊勒東阿達洪阿  
等均已次第到營大兵雲集豈可再失事機著卽督  
飭趕緊進攻掃除羣逆以清畿輔若再遲延貽誤國  
法豈能倖逃所有追賊打仗官兵准擇其尤爲出力

者秉公酌保候朕施恩

同日袁甲三奏言查皖省壽州六安向稱殷富  
久爲賊所垂涎且壽州之正陽關爲賊西竄豫  
省門戶六安爲賊南竄豫省門戶現在兩處偏  
近賊烽距廬郡一百八十里人心惶惑賊報一  
日數警近聞賊之奸細直至六安張貼僞示揚  
言賊股不日直竄六安城內居民遷徙已空該

州又經江忠源於四城外豫空濠塹現在無兵  
可守萬一賊匪猝至徒授寇資廬州喫緊和春  
無兵可撥萬難兼顧竊思豫省防堵之兵紮在  
數百里外散漫無濟不若通撥防兵進駐正陽  
六安總扼入豫門戶正陽六安無虞豫省即可  
安堵應請

旨飭下河南撫臣飛催各路防兵分布正陽六安兩路

嚴密防堵以資扼守奏入

上命軍機大臣傳諭英桂曰袁甲三奏皖省壽州六安  
恐爲賊所覬覦壽州正陽關爲賊西竄豫省門戶六  
安爲賊南竄豫省門戶現在兩處逼近賊烽請撥兵  
嚴防等語此時廬州正當勦辦喫緊之際和春兵力  
勢難兼顧河南防兵正可越境扼要堵勦固豫省之  
藩籬卽以杜北竄之要路著英桂飭令河南與安徽

接壤防兵馳赴正陽六安兩路嚴加防守並飭徐廣  
緒等督帶兵勇前往相機勦辦不得坐視鄰省賊匪  
紛竄

袁甲三又奏言查臨淮爲南北衝要水陸交通  
若僅慮廬賊北竄則困賊於廬卽無庸另行設  
防設金陵之賊由滁州北竄臨淮仍循上年故  
道何以禦之現聞巢縣賊船數百隻直駛焦湖



已抵合肥之陸家畝長樂河一帶停泊擄掠離  
廬城五六十里與城中之賊往來勾結是店埠  
之兵已有前後受敵之勢若另出一股由柘皋  
陸路循山以東直趨池河藕塘而至臨淮坦平  
大路誰能遏之况臨淮爲廬州水路門戶儻該  
逆知廬州之兵不能分而於臨淮另樹一幟與  
廬州爲犄角則廬州更難措手臨淮以南又有

聞

鳳定土匪被該逆誘以重利潛赴賊營接濟者  
並有假充逆賊聚眾搶掠者 臣再四思維擬卽  
挑選兵勇前赴臨淮妥爲布置並派駐臨淮之  
賊紆青練勇亦令隨同防禦臨淮固則北路之  
藩籬固不僅保全宿徐一帶已也奏入報

二十三日

癸亥

上命軍機大臣傳諭僧格林沁勝保曰昨於該大臣等摺內批諭解散脅從一節隨時酌量出示辦理因思該逆亡命長驅專以裹脅爲事現在奔竄餘匪其老賊爲數尙多而被脅隨行者亦復不少誠恐愚氓無知悔罪思歸投誠無路轉堅其從逆之心惟在該大臣等相機酌辦或出示曉諭射入賊壘使賊黨自相疑貳或臨陣豎旗如能殺賊投誠及自拔來歸確有

憑據者准其免罪隨地妥爲安置並酌量咨遣回籍  
其有設計詐降圖爲內應者尤當隨機應變察其真  
僞賊情詭譎不可不加意防備萬勿墮賊奸計著僧  
格林沁勝保妥籌辦理於解散之中仍寓區別之意  
庶足以孤賊勢而杜奸謀

二十七日丁卯僧格林沁勝保奏言臣等連日會

同德勒克色楞西凌阿善祿等熟商進攻之法

並布置一切雖屢次出隊殺賊無多非用大礮轟擊不能得手十六日臣等傳齊各隊並令達洪阿那敷德瑞麟瑞昌等分路進攻臣僧格林沁在西北督隊臣勝保亦繞赴西面會督各營攻撲斃匪七八十人十八日督隊攻圍漸逼賊巢逆匪從東城西面撲出經蒙古黑龍江馬隊並瑞麟達洪阿等帶兵迎勦又用五百斤銅礮

轟擊馬隊追殺數十人其東面經各兵勇圍撲  
已至辛莊村門始開槍礮逆眾情急撲出束城  
亦出多賊各隊迎擊並開放神威礮轟斃賊匪  
十餘人逆匪退踞土坡以西又經吉林黑龍江  
及蒙古馬隊由西北壓下固原官兵亦向前攻  
偏又斃賊數十人賊勢敗退臣等連日籌商恐  
西南不免空虛臣勝保復赴西南一帶相度形

勢臣德勒克色楞於二十一日催督各兵到營扼要駐紮天津大礮於本日運到三尊其餘亦陸續可到容卽相機轟擊奏入

上命軍機大臣傳諭僧格林沁勝保曰該大臣等會督大兵追剿竄匪將及兩旬不過小有斬獲尙未能大加懲創剋日掃除前經嚴旨切責該大臣等不知愧厲奮勉迅圖殄滅總以專待大礮爲詞逐日遷延何

時始能竣事且東城等村與獨流之可以負隅久踞者週別何以不能偏近賊壘是否該逆又經築有木城該大臣等匿不以聞東西兩路分兵疊進該逆均得由東城分股接應該大臣等所謂智取者安在現在大礮已到三尊其餘指日亦可運到該大臣等無所藉口著卽督飭將弁急圖殲滅之方斷不准再令乘閒竄逸經文岱蘊秀前統官兵不能遏賊西竄厥



罪甚重該二員現在何處著卽查明下落據實具奏  
同日琦善奏言本月十五日臣親赴三汊河督  
兵仍由東西兩岸進攻陳金綬督飭參將鞠殿  
華等斃賊數十人瞿騰龍德興阿督率馬步隊  
及陝甘官兵施放槍礮又斃賊三百餘名十六  
日陳金綬督兵進剿遇賊於四里鋪之南擊斃  
數十人瞿騰龍督令參將英桂等奮勇衝鋒亦

斃匪數十名餘賊敗入土城誘之不出十七日  
鞠殿華帶兵行近瓜州賊在濠南營外挑戰經  
官兵擊殺數十名瞿騰龍督率漢中延綏大名  
官兵由西岸進勦該匪祇在營外轟打並不過  
河我兵亦隔濠對擊斃賊四五十人該逆復分  
股過河我兵亦分隊前往用礮轟斃百餘人十  
八日臣親督瞿騰龍等由西岸進勦擊斃多名

又有賊匪兩股分路竄山遊擊滿祿等分隊攻  
撲開放槍礮斃賊百餘名餘匪竄入土城將浮  
橋拆斷官兵不能前進臣查瓜州賊營外濠寬  
數里巨礮林立勢難撲入雖屢獲勝仗終未能  
破其木城甄城查該處與鎮江緊對非杜其江  
面應援實難攻克現有艇船水師大小五十七  
號停泊焦山之麓一遇風便卽揚帆上駛以便

腹背夾擊奏入

上諭曰水陸夾攻自可得手著卽趕緊進攻剋日殲除  
同日崇綸青麐奏言臣等接據大營稟報十五  
日黎明督臣吳文鎔派兵勇迎敵守備劉富成  
率領鎮守兵在前副將駱永忠德亮等居後直  
抵黃州距城四五里賊匪讒擁出拒鎮守兵卽  
欲逃避當經德亮等喝住嗣因賊匪從後抄入

各勇先逃官兵繼之全行潰散督臣大營在後  
亦卽火起營盤十一座盡成灰燼督臣經兵保  
衛退往靈沙一路暫避臣等伏查全軍潰敗逆  
燄愈張現在各屬土匪肆起到處滋擾恐成大  
患因思荊州將軍台湧老成諳練久歷戎行應  
請

旨卽飭台湧會同已到之副都統魁玉統兵前往陸路

接應臣等並咨催侍郎曾國藩速將所造戰船配齊廣東購解洋礮兼程來楚會同進攻如此水陸並剿庶可杜上竄而保全局頃接探報賊船已至陽邏距省城六十里省城雖屬兵單惟有激勵兵將嚴謹防守又據臬司唐樹義稟報督臣吳文鎔接仗時該營忽見火起兵勇盡散祇得保全船礮退至葉家洲暫駐查戰艦全需

岸兵保護今孤船在洲實屬堪虞自應撤回省  
中再行辦理奏入

上命軍機大臣傳諭崇綸青麐曰賊船既有上竄陽邏  
之信省城重地關繫緊要著崇綸青麐督同文武激  
勵兵民合力固守毋得藉口人心不齊稍疏防備所  
有魁玉現帶之官兵一千名卽著留於省城毋庸隨  
同台湧前進漢口一鎮爲自江入漢要路設賊匪逞

其故智揚帆直上荆襄德安等處均屬可慮漢陽近在對江該撫務當設法撥兵防守勿令賊船闖越儘有疏失朕惟該撫等是問唐樹義所帶礮船雖不甚多惟現在湖南礮船尙未抵鄂江面攻勦尙賴有此利器已諭知台湧於進攻時酌量調帶以便水陸夾擊力遏兇鋒其黃州一帶賊匪仍與台湧會商勦辦不得專待援兵致成株守吳文鎔現在何處隨營文



武如何下落均著速查詳奏

上又命軍機大臣傳諭台湧曰逆賊竄踞黃州前經吳文鎔督兵進剿尙有斬獲乃此次進仗竟致兵勇相繼潰逃全軍敗散且營盤盡被賊焚吳文鎔避至靈沙河其餘各官亦不知下落現在逆衆占踞堵城大營並聞陽邏一帶已有賊船陸續上竄若不趕緊迎頭堵剿必致賊勢愈張辦理更形棘手台湧現駐德

安著卽酌帶官兵馳赴前路確探賊蹤所向盡力迎  
勦其潰散兵丁仍當招集該將軍當此軍情緊迫之  
際惟當激勵將士星速趨程前進總以迅掃妖氛爲  
要毋得稍事遷延並將酌帶兵數起程日期先行由  
驛馳報仍確查吳文鎔現在何處各員弁如何下落  
及此次失事實在情形切實具奏又據崇綸等奏稱  
探聞唐樹義統領舟師因見火起兵散將船墩退至

葉家洲等語此項船礮著毋庸撤回省垣一併歸台  
湧統帶調遣以備水陸夾攻所有德安北路等處仍  
著台湧設法籌顧毋稍疏虞

同日張亮基奏言臣駐防德州探聞靜海獨流  
逆匪西聚東城鎮該處距德州僅二百里當將  
臣新練壯勇二千餘名分紮劉智廟扼截留該  
州本地兵勇及滿營官兵爲後路策應連日偵

知逆賊自靜海竄出經僧格林沁擒斬已多由  
德州至河間通衢大道該逆未必敢於窺伺查  
德州附近之德平縣與直隸甯津等縣接壤其  
小道距河間亦近該處前亦派有防兵二百五  
十名尙慮兵單不足守禦其武定府屬邊界雖  
距逆烽稍遠亦須防及該逆回竄前經藩司崇  
恩留駐直隸鹽山縣新店兵勇一千餘名奉

旨令前任河南藩司王簡前往督率該員尙未抵防賊  
既西竄此項兵勇似可酌量撤回以一半調赴  
德平仍派該員統帶同德平現有弁兵扼要防  
堵一半調至德州撥赴要隘分駐其武定府屬  
之樂陵陽信海豐惠民等縣尙各有分防兵勇  
數百名仍令酌留以杜逆匪回竄此外則惟東  
昌臨清等屬與直隸天津犬牙相錯之處甚多

然其地皆在河間以西已嚴飭該府州就本地  
現有兵勇並激勵各該縣民團實力防守如果  
該逆再由河間西竄卽當相度機宜移師應援  
亦可免顧此失彼之虞奏入

上命軍機大臣傳諭張亮基曰逆匪占踞東城村一帶  
疊經大兵攻勦據僧格林沁勝保奏拏獲奸細並逃  
出難民供賊巢糧米無多不能久踞欲零星逃竄該

處距東境甚近難保不乘閒竄逸張亮基奏請將前  
撥鹽山防兵撤回調赴德平縣及德州分駐要隘防  
守以期聲勢聯絡自應如此辦理惟賊情詭譎奔突  
靡常儻由河閒西竄雖德平德州等處情形稍緩該  
撫仍當不分畛域相機移師出境應援迎頭截擊毋  
得株守一隅

二十八日

戊辰

台湧奏言臣行抵德安接辦防堵

據探督臣吳文鎔統兵進剿始而獲勝不料賊  
抄後路兵勇敗潰督臣尙無消息旋據孝感縣  
知縣李殿華稟報賊匪上竄已水陸並至漢陽  
等情伏思該匪詭譎異常去向莫測自應通籌  
江北大局惟有飛函分致於荊州則諄囑官文  
貫陞及荆宜施道昇福督率在城文武加倍嚴  
防並函商四川督臣裕瑞派兵堵紮入川要口



於襄陽則諄囑安襄鄖荆道羅遵殿妥籌布置  
並飛調鄖陽鎮官兵八百名駐紮該處以便就  
近派撥其黃州大營潰兵有陸續來至德安者  
暫行收集仍差丁於黃陂黃安麻城一帶確探  
吳文鎔消息至前調提標各營官兵現又飛催  
趕緊前來一俟到齊卽當親往調度會合河南  
助防官兵相機堵剿遏賊北竄之路奏入

上命軍機大臣傳諭台湧曰台湧奏大營失利江北情形緊急探聞賊匪水陸已至漢陽覽奏實深焦灼著台湧通籌江北大局一面布置要隘一面督兵前進以期力挫兇鋒遏賊北竄所有荆襄等處據奏已飭各該文武大員妥籌堵禦仍著該將軍隨時嚴飭帶兵各員實力防堵務與防守豫境邊界之巡撫英桂總兵柏山聯絡聲勢互爲應援武昌爲省垣重地漢

陽近在對江應如何設法兼顧並著該將軍相機籌辦至台湧現帶官兵是否足敷截剿前據青麇奏稱查有四川松潘建昌兩鎮統帶官兵已來湖北之巴東利川二縣防堵此項官兵原爲保障川省門戶而設惟遠防不如近扼已據青麇咨商務瑞酌派該鎮帶兵二千名前赴漢口一帶卽著該將軍飛催前進爲移緩救急之計並統歸台湧調遣以資協剿武昌

防守情形並隨時探明速奏

上又命軍機大臣傳諭駱秉章曾國藩曰昨據崇綸等奏黃州兵勇潰散營盤被焚總督尙無消息本日據台湧奏稱賊匪水陸已至漢陽其德安荊州襄陽等處皆與豫省接壤甚關緊要台湧遵旨前進亦未必能多帶官兵黃州潰兵卽收集亦必不甚得力鄰近省分萬無可調惟湖南撥兵應援較爲近便著駱秉

章迅卽選派精銳官兵一二千名並派曾經戰陣諳  
悉賊情之將弁管帶前往交台湧調遣勿稍延緩現  
在賊蹤已距武昌甚近唐樹義師船因岸上官兵潰  
敗撤回武昌昨有旨交台湧調遣水陸堵禦尙形單  
弱省城兵勇合計約有六七千名僅敷分布要隘漢  
陽漢口恐難兼顧儻逆匪溯漢而上窺伺荆襄攻勦  
更難得手此時惟有曾國藩統帶礮船兵勇迅速順

流而下直抵武漢可以扼賊之吭此舉關係南北大局甚爲緊要現逾正月中旬旬船勇當早齊備廣東所購洋礮諒已陸續解到著曾國藩迅卽統帶剋日開行由長江下駛與台湧會合並督同唐樹義師船水陸並進以期力遏兇鋒

上又命軍機大臣傳諭英桂曰昨據崇綸青麀奏探聞黃州兵勇潰散營盤被焚本日台湧奏稱賊匪水陸

並進竄至漢陽該將軍已飛調官兵與豫省防兵互  
爲聯絡以壯聲威惟賊勢狃獯意圖北竄固楚北之  
藩籬卽可以保河南之門戶英桂現在汝陽與湖北  
黃陂等處接壤台湧所帶兵力甚單著英桂飛飭總  
兵柏山選帶精兵出境截殺與台湧聯兵應援迅蕩  
賊氛不得區分畛域其光州信陽各處與德安麻城  
毗連並著英桂督飭所屬一體嚴防

二十九日己巳僧格林沁勝保奏言臣等於二十

六日寅刻出隊臣僧格林沁督兵先攻東城逆  
匪堅匿不出因令西凌阿在彼列隊親自折赴  
排回村會同臣勝保督兵進攻令達洪阿帶領  
健銳火器技勇巡捕各營及古北口官兵天津  
練勇攻其西南令天津固原官兵及四川山東  
河南練勇攻其東北將至村邊達洪阿帶領兵



勇親冒鋒鏑鼓勇直前兵勇傷亡數十名仍復力攻不退已將該逆鹿角寨拉開賊匪情急於東西村口分股撲出經我兩路兵勇合擊斃賊百餘名忽有馬步賊千餘名由東城撲出將我兵抄裏復經天津固原官兵施放槍礮轟斃百餘名步隊亦追殺數十名賊始退入村莊我兵受傷已多暫行收隊當攻勦排回之時有賊千

餘由東城以北直撲桃園經西窺阿督飭副將  
史榮椿等開放神捷劈山礮轟斃賊匪三十餘  
名又經黑龍江察哈爾馬隊由兩翼截殺復斃  
賊十餘名賊又另股攻撲王村經總兵孔廣順  
督令兵勇奮擊殺賊二十餘名統計斃賊二三  
百名臣等於收隊後恐該逆乘夜暗襲傳飭各  
營嚴加防範該逆果於亥刻擁眾撲營先撲北

面經兵勇擊回其西面出賊數百名亦爲馬隊  
壓退因折擾東面之張九劉九等村莊營盤經  
山東河南兵勇擊斃數十名又轉而南撲復經  
雙成督令馬隊截擊該逆乃由村後抄入營內  
疊用火彈燃燒帳房崇恩張集擊帶領兵勇接  
應又經臣勝保飛派吉林黑龍江馬隊數百名  
由東北面抄擊傷賊甚多餘匪敗退未能竄出

其南路小李村經善祿攻擊賊匪撲出百餘人  
我兵從樹林內槍礮環攻斃匪二十餘人賊卽  
回巢查連日該逆情形糧草將盡窮極思奔臣  
等惟有嚴飭各路官兵齊心協力並飛催後路  
大礮運到奮勇進攻打仗陣亡之外火器營正  
參領恭誦春奮勇捐軀應請

旨飭部議卹

僧格林沁勝保又奏言查西安右翼副都統雙成派在杜九村地方駐紮宜如何加意防範乃該逆乘夜出撲致令抄入營盤疏忽之咎實屬難辭應請

旨將雙成摘去頂戴以觀後效奏入

上命軍機大臣傳諭僧格林沁勝保曰前據該大臣等奏大礮運到三尊於二十六日齊隊奮攻朕以爲必

有把握可期一鼓蕩平乃本日據奏進剿情形仍不過小有斬擒該大臣等前奏所謂布置周妥安在耶現在廬州等處賊匪鷓鴣張仍圖北竄又據崇綸青慶台湧先後奏到黃州大營失利賊匪已至漢陽江北情形如此緊急該大臣等尤應兼籌並計肅清畿輔爲移兵南下之舉此時河間一帶勦匪情形關繫大局必當迅速殄滅或聚而殲旃或誘令出巢四面兜

擊務將首逆擒獲餘匪自不難剿洗僧格林沁勝保  
統領大兵經朕屢次嚴諭切責宜如何奮勉立功以  
圖報稱乃仍以待運大礮藉口似此耽延儻皖楚賊  
黨北竄與此股逆匪勾結勦辦更難得手該大臣等  
惟當趕緊設法攻勦迅速奏功以慰朕念

上諭內閣曰逆匪竄踞東城各村屢欲乘間逃逸經僧  
格林沁勝保親督官兵奮力擊退斃賊甚多現在大

礮業已運到著僧格林沁勝保乘此聲威迅速進剿  
斷不准再有延誤打仗陣亡之外火器營正參領恭  
誦春著交部議卹西安右翼副都統雙成在杜九村  
駐紮並不加意防守致令該逆乘閒抄入營盤殊屬  
防堵不力雙成著摘去頂戴如再不知奮勉著卽嚴  
叅懲辦

同日英桂奏言查由直入豫以彰德府屬之豐



樂鎮爲最要門戶其次則內黃楚旺水路通衢  
衛輝屬境毗連直隸而開封府屬之蘭儀河口  
北岸又與直隸長垣山東曹州接壤現在靜海  
獨流逆匪全股竄逃所有鄰近各要隘均宜一  
體設防較之皖楚接壤州縣尤爲喫重臣身任  
疆寄全省大局旣北重於南自當先其所急未  
便遠駐汝甯所有南路光州汝甯一帶責成南

陽鎮臣柏山會同南汝光道余炳燾隨時會商  
堵禦其羅山地方爲湖北入豫門戶仍飭汝甯  
府知府廖甡督勇駐守至歸陳等處前已暫留  
徐廣縉駐紮歸德牛鑑督兵馳赴陳州仍互相  
知照會合勦堵並飭該管府州嚴查周家口河  
路船隻堵其搶舟竄越臣拜摺後擬帶領兵勇  
先回省城酌量布置如河北情形緊急卽馳赴

彰德督防儘逆匪竄偏山東則大河南岸密邇  
汴梁尤當馳往防守容隨時相機籌度不敢稍  
涉大意奏入

上命軍機大臣傳諭英桂曰昨因台湧奏探聞黃州官  
兵失利賊竄漢陽諭令英桂飛飭柏山帶兵出境與  
台湧聯絡應援茲據該撫奏稱統籌豫省全局北路  
重於南路所有光州汝甯信陽一帶責成鎮道等會

商堵勦該撫帶兵回省隨時籌度等語此時楚北情形較之河北彰衛等處尤爲緊急賊勢狡猾必須防其北竄著英桂卽遵前旨嚴催總兵柏山飛速帶兵前進以勦爲防與台湧所帶官兵聯爲一氣以期力遏賊氛該撫現已回省儘楚豫交界地方情形緊急調度恐致有誤著卽折回汝陽等處督同南汝光道余炳燾汝甯府知府廖姓妥爲守禦現在靜海獨流

逆匪竄踞束城村一帶經僧格林沁勝保等屢次斬  
擒勢甚窮蹙亦難保不衝突河北一路與直隸毗連  
著卽嚴飭地方文武加意嚴防該撫務當權衡緩急  
相機策應不得以專防北路爲詞轉將南來楚匪委  
之柏山一人堵剿致有疏虞

同日福濟奏言臣於正月初十日由臨淮關帶  
領各隊前進十九日行抵店埠查廬郡賊衆固

守與安慶舒桐爲犄角之勢十分猖獗況定遠  
壽州各處土匪滋擾動卽嘯聚千人橫行搶劫  
臣行至定遠卽拏獲奸細一名帶有逆書僞示  
現在粵賊鷓張難保不意圖勾結臣到任後與  
和春悉心商酌激勵兵弁迅圖克復以仰副

聖主勦賊安民之至意奏入

上諭曰現在廬郡被賊占踞桐舒均未克復是安省軍

情緊急之至汝可數日卽發一報來雖無甚動靜亦  
不准過十日庶朕能速知籌辦尙可趕得上將此旨  
並傳知和春遵行

欽定剿平粵匪方略卷七十八 甲寅年

二月初二日

辛未

兩廣總督葉名琛廣東巡撫柏

貴奏言查前次雇募紅單船隻原爲江南剿匪之用今因船身滲漏回粵修理若俟各原船修葺完固再令赴江未免有需時日當飭副將懷塔布將原帶兩幫船三十四隻逐加勘驗僅有十九隻修理尙堪駕駛其餘皆不可用仍一面



另行添雇以期迅速現據馬映階等稟稱分往  
潭洲半埔沙灣等處紅單船二十三隻甫入海  
口合之前雇修理船十九隻共計四十二隻臣  
等飭令趕修二月初旬當可工竣彼時南風漸  
轉務令儘數起程不得稍有延誤奏入

上命軍機大臣傳諭葉名琛柏貴曰前因紅單船隻在  
福建廈門剿匪損壞准令回粵修理茲據該督等奏

續經雇募船隻於二月初旬儘數起程現在已屆仲  
春南風漸轉卽著仍派陳國泰吳全美管帶此次船  
隻較多一切駕馭彈壓必須專派大員著葉名琛於  
該省水師總兵副將內擇其熟悉洋面情形勦捕素  
稱勇敢者酌派一二員統帶前往務於春間悉數駛  
抵大江不准沿途逗留

初三日  
壬申 貴州提督佈克慎奏言臣於去歲十

月行抵湖北省城旋帶兵紮淋山河並進偏堵  
城正月十四日經督臣知照令於十五日出隊  
進勦次日臣督兵抵黃州東門連次接仗未能  
獲勝適見後路太平寺一帶火光驟起又見賊  
匪由江邊抄襲臣前後迎擊不料被賊矛傷右  
股跌馬落冰經古州兵丁張國樑等救起帶傷  
乘馬其時各營盤多有火起聞督臣已退至麻

城臣隨卽趕至並未相見探聽亦無確耗臣擬由黃陂入省會商及至黃陂該匪已於十九日竄擾漢陽橫江屯紮南北隔絕武昌城內礮聲震耳未能進省游匪已擾至黃陂灑口一帶臣於孝感縣屬之小河地方收集弁兵途次接見主事楊熙因令該員等收集潰兵以防北竄臣帶兵千名旣不能督戰取勝又不能救援大營

惟有仰求

天恩將臣從重治罪以儆無能奏入

上諭曰佈克慎著革職隨同台湧帶兵征勦

初四日

癸酉

僧格林沁勝保奏言正月二十七日

賊撲遵祖莊營盤經吉林官兵開放槍礮傷斃  
無數賊始退回復轉向念祖莊衝撲我軍齊出  
奮擊該逆踉蹌奔潰殺賊一百餘名臣等所派

馬隊趕到復追殺數十名二十九日傳令攻取  
辛莊賊於陳官莊之西擁出數百人直撲烏林  
阿之營經烏林阿督令官兵擊退臣僧格林沁  
一面進攻束城臣勝保先令山東河南四川各  
勇直前攻撲賊先於辛莊左右兩處設伏抄襲  
各勇分投抵禦賊愈聚愈多天津固原西甯河  
州官兵開放連環槍礮賊眾紛紛倒地臣勝保

復派出馬隊迎擊將騎馬賊殲斃過半臣僧格  
林沁亦親督馬隊官兵由西北抄截並於北面  
開放銅礮向賊巢轟擊臣勝保於東北面用炸  
礮神威礮轟擊統計斃賊四百餘名仍嚴飭官  
兵晝夜嚴防不准疏懈查該逆占踞各村惟排  
回地處正西臣等一面設法勦辦一面用礮攻  
擊俟收復排回西面各營俱可逼近至臣等營

盤距束城僅三里許出營數武礮力即可直抵  
賊巢且地勢寬闊馬步各隊官兵進退俱能得  
力

僧格林沁勝保又奏言總兵經文岱侍衛蘊秀  
已於正月閒趕赴大營該總兵等未能遏賊西  
竄業將所帶官兵委員管帶當茲軍務喫緊未  
便任其優游事外因將總兵經文岱侍衛蘊秀



留營差遣儻不知愧奮卽據實叅奏從重懲辦  
僧格林沁勝保又奏言前經投出之蕭良芳林  
來沈兼沈五祥沈廷方窗等六名臣勝保隨時  
體察見其痛悔前非二月初一日進攻束城令  
其隨隊打仗蕭良芳等撲入賊隊臣等目覩蕭  
良芳等力殺七賊沈兼林來沈廷等身受重傷  
似此悔罪自新可否免罪仍請量予

恩施之處出自

聖裁

僧格林沁又奏言查那木薩賚札布於正月初九初十等日隨同貝勒拉木棍布札布追剿逆匪親帶蒙古兵丁直衝賊隊該護衛手刃長髮賊多名實屬勇敢臣因該護衛係三品頂翎未敢請給二品頂戴又未便沒其微勞可否

賞給勇號出自

恩施

同日太僕寺卿齊承彥奏言臣聞賊由獨流竄  
出時匍行雪地多至骭腳皴裂現雖占踞束城  
等村勢已窮蹙臣以爲脅從之民可撫則撫亦  
釜底抽薪之一法其不受撫者正宜及時進攻  
勿失機會比地兵馬喜寒惡熱嗣後天氣漸暝

人馬易病若南賊再來彼時更難措手可否

飭諭統兵大臣乘此天氣嚴寒用我所長庶士卒氣壯  
幾輔可立見肅清至賊之伎倆全靠木城土壘  
昔日占踞獨流若何布置則東城之賊情亦可  
得其大概矣均奏入

上命軍機大臣傳諭僧格林沁勝保曰逆匪竄踞東城  
等村尙未痛加剿洗據現獲奸細供稱賊因糧食將

盡有欲於數日內他竄之語該大臣等正當乘機進  
攻爲埽穴擒渠之計至設伏誘賊出巢分股截殺固  
亦勦賊之一法但恐賊衆拌命奔突一時堵截稍疏  
仍不免潰圍他竄總不如移營偪近賊巢併力攻擊  
使逆匪無路逃竄卽可聚而殲旃乃爲上策前據奏  
稱擬挖長濠是否挑挖已就排回村距東城較遠我  
兵聲勢何由聯絡該大臣等務當設法攻勦萬不可

再延時日齊承彥奏長髮賊不能耐寒著卽激勵將  
弁及時進攻勿失機會所稱解散脅從一節著一併  
體察情形妥慎籌辦切勿墮賊奸計

上諭內閣曰逆匪占踞東城等處被圍圖竄經僧格林  
沁勝保等督率官兵迎擊疊獲勝仗著卽乘勝進攻  
盡殲醜類其前由賊營投出之蕭良芳林來沈兼沈  
五祥沈廷方窗等隨同官兵打仗殺賊著免其治罪

並賞給六品頂戴以示法外之仁

上又諭內閣曰總兵經文岱侍衛蘊秀於賊匪西竄未能堵禦均難辭罪經文岱業已摘去頂戴蘊秀著一併摘去頂戴俱著暫行革職仍留軍營交僧格林沁等差委

上又諭內閣曰索特那木彭蘇克之頭等護衛那木薩賚札布勦賊出力著賞給庫奇勒格巴圖魯名號

同日青慶奏言十二月十八日臣接據探報賊船已經上竄當卽登城瞭望見賊船全入小河口內次日直到漢陽府東門與省城西門正對官兵施放大礮擊沈大小船共九隻賊鋒頓挫卽換小船緊占江邊連夜在小河口築起土城二十日夜該逆緊貼東岸上行於塘角地方又築土牆距省城北門數里其東岸新店該逆已



經紮營是水旱兩路要隘均被占踞漢陽東門外並造木城一座省城屢經兵燹人心散渙萬難措手茲奉

諭旨馳抵武昌惟有竭力扼守或可轉危爲安奏入

上命軍機大臣傳諭台湧曰賊匪竄踞漢陽勢必擾及武昌崇綸青麐守禦省城情形甚屬危急唐樹義礮船究在何處逗留吳文鎔是否查有下落台湧接奉

此旨著卽督催官兵相機進剿並將近日賊蹤動靜及武昌情形迅速奏聞仍著隨時知會英桂柏山等於楚豫交界處所聯絡聲勢遏賊北竄其荆襄一帶仍當督飭員弁嚴加防守佈克慎現退至孝感地方已有旨將該員革職令其隨同該將軍帶兵進剿其潰散兵勇應如何分別收集並著妥籌辦理

青麐又奏言查臬司唐樹義攜帶礮船來省經

撫臣札駐鮎魚套地方近因賊船上竄礮船正  
資攻勦撫臣飛札迎提乃沿途查探現在尙無  
確音奏入

上諭曰唐樹義真係一無用之輩前次起用該員並不  
知感惟以高節自居謂勉強出山稍酬高厚屢次抗  
違死有餘辜

同日英桂奏言據光州探稟皖省六安州城復

於正月閒爲賊占踞查六安與光州並所屬之  
固始商城交界商城與湖北麻城毗連信陽羅  
山等州縣又與漢陽黃州兩府屬接壤人心頗  
形搖動此時豫省北路較之南路稍寬臣仍應  
督防南路惟豫省兵力單薄若將防兵越境剿  
辦則本處益形空虛湖北漢黃有賊信陽羅山  
等處關隘防堵兵勇更難抽調每於各州縣告

急請兵祇能節節騰挪擇其尤爲緊要者酌撥  
以應臣現暫駐適中之汝郡以爲各路應援並  
隨時偵探南北賊情何處緊急卽行馳往何處  
策應斷不敢株守一隅

同日張之萬奏言臣查河南歸陳汝光一帶或  
連湖北或接安徽皆粵匪滋擾之區獨流之賊  
近復竄出彰德各處旣應設防黃河各渡亦須

添勇兵力愈分愈恐難恃雖撫臣英桂現駐汝陽搜緝捻匪陳州有牛鑑歸德有徐廣縉而或帶勇數百名或帶勇千名以之靖土匪則有餘以之禦粵匪則不足若非勵百姓同仇之氣固各縣義勇之心此外別無長策臣聞署太康縣知縣祝塏現有歸德府屬四五縣聯莊會中首事並安徽亳州一帶居民赴省投遞公呈請該

縣督辦各處團練如准其督辦約可得十餘萬人  
人之多並可聯絡陳州所屬是誠足壯聲援可  
否

飭令河南撫臣專派該員總辦團練凡歸陳各屬團練  
事宜統歸該員經理而以牛鑑徐廣縉總其成  
惟此等團練義民必思設法鼓勵並請

飭令撫臣剴切曉示酌立賞格有能拒殺粵匪保衛城

池者如何獎勵之處明白示悉以堅其好義急公之心臣復聞歸德所屬民氣素強聯莊之中頗有能精熟技藝有勇知方者若事有專屬時時察看擇其實在可用之人鼓舞召募以歸行伍則良將勁旅未始不出於此均奏入

上命軍機大臣傳諭英桂曰逆匪竄踞廬州勦辦情形未據和春等奏報茲據該撫奏稱六安州城亦探聞



被匪竄擾皖豫交界處所必須嚴密設防其湖北黃  
州賊匪直撲漢陽河南信陽羅山等處防範尤不可  
少疏該撫仍當體察情形相機前進並隨時知會台  
湧督飭將弁互爲聲援武昌省城該匪是否竄偏著  
卽確探馳奏據張之萬奏歸德陳州一帶辦理團練  
請統歸知縣祝塏經理著該撫察看該員並酌量地  
方情形妥速籌辦

初六日乙亥福濟和春奏言臣和春接據總兵音

德布函稱六安州土匪勾結舒城逆匪於二十  
日竄至六安占踞州城伏查總兵音德布督兵  
專防六安竄路今六安賊匪雖由舒城竄入究  
未能先事豫防臣和春總統諸軍臣福濟職司  
統轄均屬籌防未周應請

旨交部議處奏八

上從之

和春又奏言查店埠爲比路要隘並無重兵堵  
守舒興阿應撥之兵未准分撥實屬無從防剿  
上年十二月十五日臣繞道赴岡子集營盤向  
舒興阿面商分撥舒興阿以所帶陝甘官兵僅  
敷調遣不能派赴店埠維時岡子集有楚勇二  
千四百名總兵音德布帶有雲南四川兵二千

餘名或於此二起內酌撥一起舒興阿以非其所轄復向婉商由臣調至店埠舒興阿又以如果調往則西路兵力益單未便調撥此外尙有已革臬司張印塘帶有兵勇一千六百名向其商派亦未允行臣折回梁園因臬司畢承昭業已到廬張印塘所帶兵勇自應移交是以將此起兵勇千餘名調至店埠紮營扼堵該兵勇於

二十日始行前來已在廬城失守之後十七日  
臣由梁園趕至店埠正在空築營壘卽聞城已  
失陷舒興阿並無來信十八日晚閒差人送文  
三件聲明由八百里飛催臣前赴岡子集營盤  
以便撥兵字據所填發文日期一係十五一係  
十七一係十八等日其廬城失守一節未准咨  
會二十一日又據來咨前因廬郡被圍緊急官

兵與賊對敵是以難令前往店埠今城池已失  
應遵

旨撥出官兵飭令前赴店埠進剿卽經臣函覆以廬郡  
旣失亟應趕緊遏住竄路使逆匪無從擾及他  
處西面路通六安防堵關繫緊要所有陝甘官  
兵應留於西面防守此時未可分撥舒興阿於  
二十三二十七等日仍復催令移會臬司趕備

馱載以便官兵前赴店埠又經臣明晰咨覆此  
舒興阿於廬州失陷之後始行撥兵臣咨會留  
於西面防堵並非因前此不肯分撥不願調取  
之原委也又查舒興阿統帶陝甘官兵六千名  
外西路原有楚勇二千餘名又音德布帶雲南  
四川兵二千餘名張印塘管帶兵勇一千餘名  
彼時均未調撥合算實有一萬餘名舒興阿所

稱祇有六千名係指親帶陝甘兵而言以致數目不符奏入報

初七日

丙子

張亮基奏言豫東兩省黃河渡口爲

遏賊北竄要津必須嚴查船隻出入惟東省南運引商應銷豫省歸德等屬官鹽向由曹州府屬之單縣董家口渡河分赴各屬售銷前據通



判李彥森以應否准其照常過渡具稟請示河  
臣長臻則以運銷官鹽民食攸關自難一律禁  
止臣通盤籌畫約計各商應運鹽包於該渡日  
設小船十隻每日渡鹽千餘包以四十日爲限  
足可運竣卽責成道員李天錫等催令各商如  
期趕運不准如常年之壓前等後並令該商於  
過渡時北岸一商發鹽雇夫擡運上船南岸一

商收鹽雇夫起運下船南北人夫不准過岸一  
俟渡竣卽將各船裁撤與民運煤炭糧食常川  
過渡漫無稽覈者不同兩岸人夫不准過岸亦  
可杜絕奸匪偷渡奏入

上命軍機大臣傳諭王履謙長臻英桂張亮基曰現在  
獨流潰竄餘匪仍踞束城村一帶卽著照張亮基所  
議接運官鹽妥爲趕辦但不准拘定四十日之限總

以迅速運竣爲要其尋常販運煤米船隻仍著一概  
收集毋令奸細乘閒偷渡王履謙巡河是其專責長  
臻職司總河英桂張亮基身任地方均著懷遵前旨  
督飭各該委員及地方文武營汛認真巡緝儻再有  
賊蹤闖入國法具在豈能倖逃

初九日

戊寅

僧格林沁勝保奏言查逆匪占踞東

城等村臣等連日進攻該逆死拒不出我兵連

次撲近牆柵逆匪暗由牆孔施放槍礮密如雨  
下每遇進撲賊巢弁勇時有傷亡調到大礮向  
排回等村轟打擊塌屋宇甚多壓斃逆匪無算  
現在該逆雖不能竄出仍恐其乘隙逃逸臣等  
再四籌度惟有開挖深濠以資圍困該逆如拌  
死奔撲我兵卽可奮力截擊儻竟如前死守我  
兵祇須嚴扼長圍不日賊巢糧盡卽可不攻自

潰彼時亦易剏殄現在東北西北兩面開挖已竣並於濠外安放鹿角樹柵其西面亦經動工趕緊挑挖東南面一片積水間有不能挖濠之處亦卽設法堵截惟有顛懇

天恩暫寬時日俾得極力圖維曷勝悚惶屏營之至奏  
八

上命軍機大臣傳諭僧格林沁勝保曰此股竄匪該大

臣等若能於奔突未定之時乘機協勦何致遷延至此尙不能埽穴擒渠乃日久布置仍似此敷衍入奏並未立有尺寸之功自問於心能無愧乎刻下大礮已到東北西北空濠已竣西面東南兩路亦皆設法堵截著卽督率各路官兵趕緊進攻若不及早奏功國法豈能再宥

同日琦善奏言查灣頭在揚城東北地居堂奧

於形勢無關近聞慧成以灣頭兵單請調駐防宿遷之山西營兵三百名移紮臣查東路及施家橋一帶已有陳金綬率兵駐紮臣又撥兵分立營壘賊匪豈能越揚城而擾及灣頭若南路戰兵不能退賊則後隊皆望風而靡即使灣頭駐兵三百亦復何濟於事臣以爲灣頭毋庸添兵宿遷之兵萬不可調往他處奏入

上諭曰軍營總貴事權歸一焉能事事請旨懋成父子  
日若懸河藉效忠之名實祇自衛而已

琦善又奏言本月二十等日總兵瞿騰龍等帶  
兵由西岸馬橋進攻瓜州敗其伏賊參將鞠殿  
華等由東岸進攻誘賊不出二十六日東風大  
作艇船直泊瓜州用礮轟擊賊營斃賊無算次  
日臣密飭官兵乘雪進兵攻其不備一面知會



艇船爲腹背夾擊之舉遂於二十八日子刻臣親督官兵出隊由運河東西兩岸及東岸之虹橋西岸之馬橋四路進攻辰刻艇船由金山截駛下攻瞭見北岸官兵亦正對仗總兵葉常春等轟倒賊匪礮臺一座並擊沈大賊船三隻餘匪悉溺於江二十九日辰刻復經艇船駛赴瓜州大口擊燬逆匪瞭臺一座賊船隨卽折回

常春等卽飭將弁分帶局艇追及於老河影江  
面沈其二船是日陸路官兵仍由運河兩岸進  
攻該逆皆在土城內官兵用礮向其轟擊多有  
殲斃該賊仍堅守不出查瓜州地處江濱該逆  
掘濠環營又引江水灌濠非水陸夾擊難期速  
殄昨據總兵李志和稟報大小賊船一百餘隻  
從金陵駛至儀徵江面均在江心行走不敢泊

岸等情顯係金陵賊渠聞瓜州被攻緊急遣黨  
來援若不先扼瓜州上下兩岸江口杜金陵鎖  
江兩路之接濟不惟船在江面陸路官兵無從  
堵剿而來源不斷卽舟師亦難得手該艇船此  
番連次打仗頗爲奮勉現又藉詞修理退泊焦  
山惟有仰懇

天恩嚴飭統帶艇船之該總兵等緊扼瓜州上下兩口

庶可攔截江面以斷接濟而孤賊勢奏入

上諭曰此次尤爲出力者速行查明保奏葉常春李德麟周士法均著革去頂戴以觀後效如再有藉詞觀望之處卽先行正法順便奏聞

琦善又奏言據總兵武慶等呈稱正月十六日二更時南岸逆船百餘隻駛至浦日之馬家莊該總兵等督率遊擊王巨孝等馳往堵截甫至

江干適該逆船正欲泊岸官兵施放槍礮殲匪  
多名復令魁霖等帶領火器營兵丁從旁抄出  
用火箭火毬焚燒逆船多隻斬殺及焚溺者不  
計其數其餘逆船意欲逃竄該鎮復督令兵勇  
撿拏奪獲大船二十六隻小船十隻起獲八百  
斤大礮一尊五百斤四百斤大礮各二尊三百  
斤以下礮十二尊臣查浦口北通滁鳳南對金

陵係驛站要衝於地勢最爲喫緊此次逆船一  
百餘號乘月夜連檣北駛經總兵武慶等以陸  
路官兵勦燬淨盡合無仰懇

天恩俯准將出力各員從優保奏奏入

上從之

琦善又奏言查行軍之道首在激揚士氣苟馳  
驅况瘁而莫之矜貧困飢寒而莫之恤情不得

以上聞澤不遑於下究致令行閒解體戰士與  
嗟此皆統兵者之過也 臣視師以來猶賴隨征  
諸將士勦力同心雙來死事於前瞿騰龍等宜  
勞於後大小百餘戰從無挫衄去冬寇援麴至  
轉戰一月士心愈奮不幸勇潰賊竄未盡殲除  
軍中將士咸爲眦裂又賊踞瓜州衝寒出戰浦  
口六合等處沿江防守亦復屢有殲擒特以軍

營積習往往小有俘斬輒旨殊勳臣實不敢效  
尤又以巨寇未殄當懸重賞留以有待非敢抑  
其功而不言也既而思之爲

國家靳惜名器而不肯從實臚陳坐使勞勩經年  
者曾無片長見錄彼見他人之倖進未免自覺  
向隅不能得其心卽不能用其力如是則雖有  
孫吳之將不能成功至師行糧食自古爲然粵



寇之起官軍駐粵駐楚糜餉至累千萬迨臣督  
師江上已值度支告匱之餘乃他處軍營猶得  
轉輸相繼其募勇者又或藉資勸捐或提用各  
項生息本銀士飽馬騰從無缺餉獨臣軍營不  
給餉者已及半載前經戶部奏撥臣營之粵餉  
行至中途又爲湖北截留矣此時軍無見糧士  
有菜色陣亡召補無人應募撫綏之術至是已

窮况別處軍營皆不缺餉相距咫尺士卒豈無  
所聞責戰則同饋軍則異揆諸事理未可謂平  
萬一軍心渙散恐至不可收拾彼時卽將臣從  
重治罪亦復於事何補伏願

皇上俯准將出力將領弁兵合計一年勞績量予獎勵  
由臣覈實酌保並祈

飭下戶部速撥實存庫款接濟臣營兵餉兼

飭沿途經過各省務遵前次部文毋得擅自截留以致  
有名無實奏入

上諭曰所有出力各員弁准汝覈實保奏琦善大營軍  
餉著戶部作爲另款急速籌畫旋經戶部議覆於該  
營近省地丁鹽關雜款各項內每月協濟各若  
千萬兩

上從之

琦善又奏言臣案今之鄉勇卽前代之鄉兵以  
土著之民捍桑梓之患蓋以董之者有紳士治  
之者有牧令故勇怯易知莠良易辨樂趨事而  
憚犯法非謂可以離鄉而殄賊也乃今之用鄉  
勇者往往移而用之他府他縣且用之他省用  
之遠省地形非所知風俗非所習非有族鄰之  
可聯以情非有官紳之可察其弊其應募者大

抵市井負販之徒乞匄無籍之輩甚且盜魁恃  
爲逋藪奸民藉以寄食總而言之不過趨利而  
來設使賊以金帛相啗安知不爲重利所誘而  
去小則潛遞消息大者卽爲內應武昌安慶之  
陷城鎮江之塌營比比然矣臣愚以爲鄉勇一  
項祇宜用之於各州縣不宜用之於軍營卽不  
得已而用之亦於募勇之時造具花名清冊送

部庶幾有所稽覈斷不宜任令來去自由漫無  
覺察如今日之甚者也嗣後除各州縣自行團  
練毋庸造冊報部覈銷外其餘各省軍營現存  
之勇請

旨飭下統兵大員轉飭帶勇各員一一確查姓名籍貫  
住址限於十日內造具花名清冊並將勇目及  
帶勇各員分晰開載呈報戶兵二部及統兵大

臣查覈庶令兵勇同歸伍籍而餉項亦不致虛  
糜奏入

上諭曰軍機王大臣會同該部妥速議奏惟期事歸覈  
實餉無虛費旋經軍機王大臣會同戶部議覆此次  
琦善所請將各營現存之勇造具清冊呈報戶  
兵二部及統兵大臣查覈之處係爲覈實支銷  
起見應如所請

上從之

三十一

三十一